

U Lamentu di Stelluccia

O Stellu... a mio Stelluccia,
A mio cagna pecuraghja,
Di pilame era turcata
E di musu mascaràta;
Calzata a dui pedi
E a coda inchjerchjàta.

A fronte era stellata,
L'arecchje in forma d'ancini ;
Era di a razza corsa
A razza di i Cursini;
U so pelu luccichente
È u sguardu intelligente.

Incu Tremendu u to fratellu
Erate a grand pariglia;
Quande vo caccighjavate
O chi bella meraviglia;
Tremendu battia u spronu
E tu battia la briglia.

Accumpagnata cùn Tremendu
Faciate a caccia mossa:
Ellu andav'a move
E tu pigliava a posta ;
Prima ch'ella fussi intanata
Cudanella era burlata.

Cun Tremendu d'accusentu,
Cane malignu è rèiu,
S'ella vi cascava in bocca
Ne faciate u ghjubleiu;
Si sentia u fracassu
Da l' Alzi à u Castellacciu.

Difendia e pecurelle
Da tutti i predaghji,
Da a volpe è da i cani
Epo ancù da l'omi ladri;
Di note cum'è di ghjornu
Facia sente i t'abbaghji.

Di e pecure a cumpagna,
Di l'agnelli era a mamma,
Quand'ell'eranu in figliera
Facia cum'è l'Altagna,
Appulata antu i pinzi
Tu mirava a to banda.

E da un pughjale à l'altru
Ti nè stava sempre in guardia,
Ogni tantu qualchi levra
A cacciava di a guaglia;
Ma quand'ell'era cudanella
Tandu ingaciava bataglia.

Quandu t'aghju trovu morta
In fondu di u machjone,
Invaccinata di sangue
Traversat'à u pumone,
Chè t'era tumba di piombu
Un c'era cunfusione.

Un cacciatore sgallabatu
T'hà pigliatu pè un cignale,
Stelluccia a mio cagna
Vogliu fatti u funerale;
Epo fatti imbalzamà
Per pudeti rimira.